

## **Հայտարարություն 2004թ. ապրիլի 5-ի հանրահավաքի ժամանակ լրագրողների դեմ բռնարարքների վերբերյալ գործով դատավարության կապակցությամբ**

Հունիսի 29, 2004

2004 թվականի հունիսի 10-ին Երեւանի Կենտրոն եւ Նորք-Մարաշ համայնքների առաջին ատյանի դատարանն ապրիլի 5-ի հանրահավաքի ժամանակ լրագրողների դեմ բռնարարքներ կատարած երկու անձանց դատապարտեց տուգանքի՝ 100 հազարական դրամի չափով: Դատավարությունը վերածվեց ֆարսի: Մենք չենք կարող այլ անուն տալ, քանի որ եւ նախաքննությունը, եւ դատավարության ընթացքը, եւ դատավճիռը տարակուսանք ու վրդովմունք են առաջացնում: Նախ՝ գործը հարուցվել էր Քրեական օրենսգրքի միայն 185 հոդվածի («Գույքը դիտավորությամբ ոչնչացնելը կամ վնասելը») առաջին մասով, մինչդեռ պետք է որ մեղադրանք առաջադրվեր նաեւ 164 («Լրագրողի մասնագ իտական օրինական գործունեությանը խոչընդոտելը») հոդվածով. ապրիլի 5-ին լրագրողների հանդեպ կատարված բռնությունները պարունակում են ՀՀ Քրեական օրենսգրքի այդ երկու հոդվածներով նախատեսված հանցագործությունների հատկանիշներ: Հետեւաբար, պետք է կիրառվեր ՀՀ Քրեական օրենսգրքի 20-րդ հոդվածը («Հանցագործությունների համակցություն»), ինչը չի կատարվել նախաքննություն իրականացնող մարմնի կողմից: Դատարանն էլ չուղղեց նախաքննության սխալը եւ գործը չուղարկեց լրացուցիչ քննության:

Ոչ նախաքննական մարմինը, ոչ դատարանը ցանկություն անգամ չդրսետորեցին պաշտպանելու տեղեկություններ հավաքելու եւ տարածելու լրագրողների իրավունքը, էլ չենք ասում, որ նշանակված պատիժը համարժեք չէր արարքին: Ավելին, լրագրողների մուտքը դատարանի դահլիճ խոչընդոտում եւ դատավարության ընթացքի վրա ազդում էին հանցագործությունը կատարած անձանց կողմնակիցները:

Մենք սպասում էինք, որ կլինեն այլ բացահայտումներ եւ դատավարություններ, սակայն անցած ժամանակաշրջանում ոչինչ չի արվել մյուս բռնարարքների հեղինակներին հայտնաբերելու ուղղությամբ:

Առայսօր միջոցներ չեն կիրառվել այն ոստիկանների նկատմամբ, ովքեր ապրիլի 5-ին քայլեր չձեռնարկեցին լրագրողներին քաշքշող ու տեխնիկան ջարդող անձանց դեմ:

Չեն բացահայտվել եւ պատժվել նաեւ Բաղրամյան պողոտայում ապրիլի 12-ի լույս 13-ի գ իշերը լրագրողներին ծեծի ենթարկած ոստիկանները: Անգամ չեն դատապարտվել նրանց գործողությունները: Դրա փոխարեն իշխանության ամենավերին օղակներից հնչել են հայտարարություններ, թե լրագրողներին հնարավոր չէր տարբերել ցուցարարներից:

Մենք կրկին պահանջում ենք հարգել տեղեկություններ ստանալու հասարակության և տեղեկություններ տարածելու լրագրողների իրավունքները ու կանխել դրանց նկատմամբ ոտնձգության ցանկացած փորձ:

Մենք կոչ ենք անում բոլոր լրատվամիջոցներին և լրագրողներին՝ ավելի համախմբված և հետևողական լինել, երբ խոսքը վերաբերում է մասնագիտական համերաշխությանը, երբ ոտնահարվում է ազատորեն տեղեկություններ հավաքելու և տարածելու իրավունքը:

**Երեւանի մամուլի ակումբ**

**Հայաստանի Ժուռնալիստների միություն**

**Հայաստանի «Ինտերնյուս» ՀԿ**

**Խոսքի ազատության պաշտպանության կոմիտե**